

Nr. 10: *Mîn frowe, diu wil lônene mir*Überlieferung: Heidelberg, Cpg 848 (C), Bl. 267<sup>v</sup>–268<sup>r</sup>

I Mîn frowe, diu wil lônene mir,  
 der ich sô vil gedienet hân.  
 des sult ir alle danken ir,  
 si hât sô wol ze mir getân.  
 5 si wil, daz ich ir wende den Rîn,  
 daz er für Kobelenze iht gê.  
 sô wil si tuon den willen mîn.  
 mag *ich* ir bringen von dem sê  
 des grienes, dâ diu sunne <...> gêt  
 10 ze reste, sô wil si mich wern.  
 ein sterne dâ bî nâhe stêt,  
 des wil si von mir niht enbern.

Ich hân den muot:

swaz si mir tuot,

15 daz sol mich allez dunken guot.  
 si hât sich wol an mir behuot,  
 diu reine.  
 sunder got al eine  
 sô weiz die frowen nieman, die ich dâ meine.

II Ich muoz dem mânen sînen schîn  
 benemen, sol ich si behaben,  
 sô lônene mir diu frowe mîn,  
 mag ich die werlt alumbe graben,

5 meht ich gefliegen als ein star,  
 sô tæte diu liebe, des ich ger –  
 und hôhe sweiben als ein ar.  
 unde ich zemâle tûsent sper  
 zertæte als mîn her Gamuret  
 10 vor Kamvoleis mit rîcher jost,  
 so tæte diu frowe mîne bet.  
 sus muoz ich haben hôhe kost.

Ich hân etc.

III Si giht, muge ich der Elbe ir fluz  
 benemen, sô tuo si mir wol –  
 dar zuo der Tuonowe irn duz.  
 ir herze ist ganzer tugende vol.  
 5 den salamander muoz ich ir  
 bringen ûz dem fiure her,  
 sô wil diu liebe lônene mir  
 und tuot ze mir, des ich dâ ger.  
 10 mag ich den regen und den snê  
 erwenden, des hœere ich si jehen,  
 dar zuo den sumer und den klê,  
 sô mac mir liep von ir geschehen.

Ich hân etc.

I 8 *ich*] *fehlt C* *ich Sieb.*9 *sunne* <...> gêt] *füne vf get C* *sunne get Sieb.*I 8 *mag*] *mag C* *mac Sieb.*19 *die ich*] *die ich C* *diech Sieb.*II 4 *mag*] *mag C* *mac Sieb.*alumbe graben] *alvmbe grabē C* *al umbe graben Sieb.*6 tæte] *tete C* *taet Sieb.*8 unde] *vnde C* *und Sieb.*9 zertæte] *zertete C* *Vertaete Ba. Sieb.*11 tæte] *tete C* *taet Sieb.*III 3 *Tuonowe irn duz*] *t̄vnowe irn dus C* *Tuonouw iren duz Sieb.*6 *bringen*] *bringē C* *gebringen Ba. Sieb.*10 *mag*] *mag C* *mac Sieb.*11 *hœere*] *hōre C* *hoer Sieb.*